

სული

შაჰი-შაი ჯიუტი ადამიანი იყო. თუ ერთხელვე ამოიჩემებდა რასმე, უსათუოთ უნდა აესრულებია. როცა მის სურვილს რაიმე წინააღმდეგობა და სისრულეში მოყვანა შეუძლებელი ხდებოდა, ავად შეიქნებოდა და აქიმები ტყუილა ცთილობდნენ მის მორჩენას.

ერთხელ შაჰი-შაიმ იკითხა:

-- სად არის ადამიანის სული?

-- თავში, -- უპასუხეს დიდებულებმა.

-- გულში -- უპასუხა პოეტმა.

-- სტყუით! --- განრისხდა შაჰი-შაი. -- არ მომწონს თქვენი პასუხი.

რადგან თვის კითხვაზე ყენმა დამაკმაყოფილებელი პასუხი ვერ მიიღო, ბოლმა მოერია, დასუსტდა და სახლიდან ვერ გამოდიოდა.

დიდებულნი ცდილობდნენ ხმა-ტკბილი ბაიათებით, მგოსანთა ხოტბა-დიდებით, ბანოვანოვანთა ცეკვა-რხევით გაერთოთ ისპაჰანის მბრძანებელი, მაგრამ იგი უფრო და უფრო ყვითლდებოდა. კვნესოდა და გულმოსული ერთი-მეორეზე უსასტიკეს ზნე-ჩვეულებას იჩენდა.

შემძრწუნდა ხალხი.

გადაწყვიტეს ეძებნათ კაცი, რომელიც ამოცანას ახსნიდა და გაბოროტებული შაჰის რისხვისგან იხსნიდა მათ.

ასეთი კაცი აღმოაჩინეს. იგი იყო ტყეთ წასული ვილაც ბრძენი. სახლი მიეტოვებია: ტანთ თითქმის არ ეცვა. ძვირად თუ ვისმე დაელაპარაკებოდა და მუდამ ცას შეჰყურებდა. მას სულელს უძახდნენ-ძვირად თუ ვინმე დაელაპარაკებოდა, მაგრამ უმწვერვალეს გაჭირვების დროს ყოველთვის მას მიმართავდნენ.

-- გადაგვარჩინე! -- შეეხვეწნენ მას.

-- კარგი, თუკი გინდათ, მაგრამ ღირს კი? შაჰის თუ გადაურჩით, შიმშილი მოგკლავთ, შიმშილს თუ მოერიეთ, ხანი. თვით სიკვდილი კი არაფერი საშიშო არ არის. იგი ფერისცვალებაა მხოლოდ. სწორედ ისე, როგორც დღეს ვისაც თეთრი აცვია, ხვალ შავს ჩაიცვამს. ეს რათ უნდა იყოს საშიში და საძაგი? სულ ერთი და იგივეა.

-- შენსას ვერაფერს გავიგებთ და შენ ჩვენსას ვერ გაიგებ. დაგვეხმარე ამ საქმეში. გადაგვარჩინე და მერე, რაც გინდა, ის გვითხარი. ჩვენც ყურს მაშინ დაგიგდებთ -- ახლა კი მაგის დრო არ არის. ვწყდებით, გვიშველე!

თმა-გაწეწილი, ძონძებში გახვეული, ჭუჭყიანი ბრძენი კინაღამ არ გამოაგდეს სასახლიდან, მაგრამ, როცა გინებას ყური არ ათხოვა, დარტყმაზე გაიცინა და სიკვდილით დასჯით დამუქრებაზე თქვა: "სულ ერთიაო", მსახურთ გაუკვირდათ და ავადმყოფს შაჰის მიგვარეს.

-- სადაა ჩემი სული! -- დაეკითხა შაი ბრძენს, როგორც კი დაინახა ახალი სახე.

-- შენ გვირგვინში...

-- ამისი? --- ხელმეორეთ დაეკითხა შაი და მიუთითა მხატვარზე.
-- იმ სურათში, რომელსაც ახლა ხატავს.
-- მაშ ათასი სული ჰქონია მხატვარს, რადგან ათასი სურათი
მაინც დაუხატავს. შეხედე გველეშაპის დასისხლიანებულ თვალებს
და, აი, თითქოს ახლა მოსულა ინდოეთიდანო, საკუნტალას. ორივე
მისი სულია?
-- ჭეშმარიტათ! -- უპასუხა ბრძენმა.
-- ამ ბავშვის სული სადღა უნდა იყოს? -- შაჰი უფრო და უფრო
ბრაზდებოდა. თანაც ცნობის მოყვარეობამ აიტანა. ტახტზე წამოი-
წია და თვალები ჩააშტერა ბრძენს.
-- ვაშლში, რომელსაც ისე ნდომით შეყურებს.
ბავში, მართლაც, თვალებით ყლაპავდა ვაშლა, რომლის ერთი
მხარე ბროწეულის ყვავილივით წითელი იყო და მეორე კი ქარვასა-
ვით ჩაყვითლებოდა.
-- შენი კი, შენი? ჩქარა მითხარი ვიღაცა ხარ!
-- ჩემი მსოფლიოში, აქ, იქ, ზემოთ -- ცაში და ქვემოთ -- დე-
დამიწაში, მარადისში და განუსაზღვრელში.
-- მე ერთად-ერთი სული მქონია, -- ფიქრობდა შაჰი-შაი. ---
მხატვარს, ბავშვსაც კი, ათასი. ბრძენის სული კი განუსაზღვრელია
და მარადისი. ჭეშმარიტათ მათთან შედარებით მე საცოდავი ვარ.
და შაჰი-შაის სურდა ან ბრძენი ყოფილიყო, ან მხატვარი და ან
ბავში მაინც!
ბავში მაინც!
და რადგან ეს არ შეეძლო, უფრო და უფრო მძვინვარებდა შაჰი-
შაი, რომლის სული მხოლოდ მის გვირგვინში იყო მომწყვდეული.